

Für den Kickers Kurier am 14.10.2011

Moin, leev Kickersfans!

Kann uns Kickers Emden neet mehr winnen? Disse Fraag stellt sük, na dem man söben Spölen nananner neet mehr wunnen hett. Wenn so wieder spölt word, dann word dat würrelk nix mit de 5. Platz in de Tabell van de Oberliga Neddersassen, up de wi all so hopen. Na dat mit 2:4 verlorene Spöl lesd Week in Rotenburg hett Kickers-Trainer Uwe Groothuis seggt, dat man sük neet as Mannskupp präsentiert harr. He will doran arbeiden, dat dat in Toekummst beter word. Ik bün seker, he schafft dat ok.

Kickers-Kaptein Andreas Gerdes-Wurpts see na dat Spöl up 'n Fraag van 'n Reporter in 't Radio, dat he noch Hopen hett un Kickers sük in de Rüggrunn de nödige Punkten för de 5. Platz haalt. Glöven wi dat maal.

Ja, leev Fans van Kickers Emden. Dat sücht upstünns neet goed ut. Dat mutt beter worden. Vandaag, hier unner Floetlücht in de Oostfreesland-Stadion, kann Kickers weer wat goed maken. Tegen de TSV Ottersberg mutt einfach wunnen und dree Punkten haalt worden.

In disse stur Tied för Kickers Emden sullten wi dorum all toesamen hollen: De Mannskupp, de Vereen un de Fans mutten an een Tau trecken, natürelk blot in een Richt. Dorum mutten wi vannabend uns Kickers-Mannskupp van de eerst bit lesd Menüte luudstark anführen!

Ik bün mi seker, dat Kickers dann dat Spöl tegen de TSV Ottersberg ok winnt un dat dit de Anfang is, wor Kickers weer hoger in de Tabell stiggt.

De Hopen starvt ja as lesd, word d' seggt. Klammern wi uns an disse Sprökje un drücken wi uns Kickers Emden hier in 't Stadion de Dumen.

So leev Kickers-Fans,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.
Mit hartelk Gröten
Joe Erich Bolinius